

道 隐 序

张陶庵作《西湖梦寻》，向余问讯曰：“弟闻《华严经》，佛言华严世界南瞻部洲特华严海中一弹丸之地，则西湖不直一蠡壳水，其境界甚小。汤若士传南柯，蚁穴中有国都、郡邑、社稷、山川。则西湖不止一蚁穴，其境界又甚大。两说不一，乞和尚为我平章之。”余曰：“佛言世间凡事大小，皆繇心造，若见为大，则芥子须弥矣，若见为小，则黄龙蜿蜒矣。佛于此只不动念，则境界俱空，大小尽化，蕉鹿庄蝶，一听其自为变幻，于我空相，则亦何有？以余所见，大小高下，只在目前。即以西湖言之，尔见六桥三竺，缥缈湖山，其大若此。若置身于南北高峰，由高视下，西湖只一杯之水，歌舫渔舟，正如飞凫浮芥，为物甚微。盖眼界所及，愈低愈小，则愈高愈大。庄生所言，鲲背鹏翼，千里而遥，鹏之视人，亦何异人之视蚁。《齐谐》志怪，勿得尽以寓言忽之。昔有人渡海，飞来一物，大如风帆，以篙击之，是一蝶翅，称之，重八十余斤。则天壤间实有是境，实有是物，或大或小，一任人之见地为之。余眼光不及数武，何能为尔定其大小也。尔若只以旧梦是寻，尚在杯水浮芥中往来盘礴，何足与于寥廓之观。”武林道隐偶题。